

Na osnovu člana 22 Statuta Brčko distrikta BiH - prečišćeni tekst (Službeni glasnik Brčko distrikta BiH, broj 2/10), člana 64 Poslovnika o radu Skupštine Brčko distrikta BiH (Službeni glasnik Brčko distrikta BiH, broj 17/08), i Prijedloga odluke gradonačelnika broj: 05-01.1-000686/10 od 8. aprila 2010. godine, Skupština Brčko distrikta BiH, na 24. redovnoj sjednici održanoj 14. aprila 2010. godine, donosi

O D L U K U
O USVAJANJU PROGRAMA SUBVENCIONIRANJA DIJELA KAMATA ZA KREDITE
PREDUZEĆIMA I PREDUZETNICIMA NA PODRUČJU
BRČKO DISTRIKTA BiH ZA 2010. GODINU

Član 1

Usvaja se Program subvencioniranja dijela kamata za kredite preduzećima i preduzetnicima na području Brčko distrikta BiH za 2010. godinu.

Član 2

Sastavni dio ove odluke je Program subvencioniranja dijela kamata za kredite preduzećima i preduzetnicima na području Brčko distrikta BiH za 2010. godinu, broj: 01-02-212/10-1 od 14. aprila 2010. godine.

Član 3

Ova odluka stupa na snagu danom donošenja i bit će objavljena u Službenom glasniku Brčko distrikta BiH.

Broj: 01-02-212/10
Brčko, 14. aprila 2010. godine

PREDSJEDNIK
SKUPŠTINE BRČKO DISTRIKTA BiH

Mirsad Đapo, dipl. pravnik, s.r.

PROGRAM
SUBVENCIONIRANJA DIJELA KAMATA ZA KREDITE PREDUZEĆIMA I
PREDUZETNICIMA NA PODRUČJU BRČKO DISTRIKTA BiH ZA 2010. GODINU

Član 1
(Cilj programa)

Ovim programom regulišu se: korisnici programa subvencioniranja dijela kamata, sredstva programa, minimalni i maksimalni iznos kredita, namjena sredstava, rok trajanja programa i visina subvencionirane kamatne stope, uslovi koje treba ispuniti korisnik, postupak odobravanja i kontrola korištenja i izvještavanje.

Član 2
(Korisnici programa subvencija)

(1) Pravo na korištenje subvencije dijela kamata imaju privredni subjekti s područja Brčko distrikta BiH koji:

- a) imaju sjedište preduzeća, preduzetnika ili podružnice u Brčko distriktu BiH,
- b) registrovani su kao preduzeće, samostalni preduzetnik ili podružnica u skladu sa zakonima Brčko distrikta BiH,
- c) registrovanu djelatnost obavljaju na području Brčko distrikta BiH.

(2) Pravo na korištenje subvencije dijela kamata ne mogu ostvariti banke niti druge finansijske organizacije i osiguravajuća društva.

Član 3
(Sredstva programa)

Ukupan iznos sredstava namijenjenih za subvencioniranje dijela kamata u iznosu od 1.500.000 KM je osiguran Budžetom Brčko distrikta BiH za 2010. godinu i nalazi se na organizacionom kodu 17010001 - Pododjeljenja za privredni razvoj, ekonomski kod 614311 – Grantovi neprofitnim organizacijama.

Član 4
(Minimalni i maksimalni iznos kredita)

(1) Minimalan iznos kredita za koji će se subvencionirati dio kamata je 5.000,00 KM, a maksimalan iznos kredita za koji će se subvencionirati dio kamata je 1.500.000,00 KM.

(2) Za preduzeća i preduzetnike iz oblasti trgovine minimalan iznos kredita za koji će se subvencionirati dio kamata je 5.000,00 KM, dok je maksimalni iznos kredita 300.000,00 KM.

(3) U slučaju da korisnik subvencije dijela kamata na kredite realizuje kredit veći od 1.500.000,00 KM, odnosno veći od 300.000,00 KM, „RGFBD“ Brčko distrikta BiH će subvencionirati dio kamata na iznos kredita do 1.500.000,00 KM, odnosno na iznos kredita do 300.000,00 KM, a za razliku preko ovog iznosa kredita neće se subvencionirati dio kamata.

(4) Ukoliko jedan privredni subjekt realizuje dva ili više kredita imat će pravo na subvencioniranje dijela kamata na zbir kredita koji ne prelazi iznos od 1.500.000,00 KM, odnosno 300.000,00 KM.

Član 5 (Namjena sredstava)

(1) Subvencionirani dio kamate bit će primijenjen na kredite odobrene za sve namjene, osim za one koji će biti korišteni za nabavku putničkih i terenskih vozila, a koji ne služe za obavljanje registrovane djelatnosti.

(2) Subvencionirani dio kamata bit će primijenjen i za nabavku osnovnih sredstava putem lizinga, osim lizinga za putnička i terenska vozila, koji ne služe za obavljanje registrovane djelatnosti.

(3) Kamata će se subvencionirati za kredite koji su odobreni putem svih banaka u Bosni i Hercegovini.

(4) Subvencionirat će se i dio troška na ime plaćanja profitne marže od strane korisnika bankarskih sredstava prema banci koja na takav način posluje. Trošak ne uključuje troškove obrade zahtjeva i troškove penala.

Član 6 (Rok trajanja programa i visina subvencionirane kamatne stope)

(1) Subvencionirat će se dio kamata na odobrene komercijalne kredite sa rokom otplate do deset godina i kamatnom stopom do 13%.

(2) Visina subvencioniranog dijela kamata za odobrene kredite iznosi 50% od ugovorene kamate.

(3) Pravo na subvencioniranje dijela kamata imaju preduzeća, samostalni preduzetnici ili podružnice na sve kredite čiji anuiteti dospijevaju u 2010. godini, pod uslovom da su uredno vraćali kredite u prethodnom periodu.

(4) Dio sredstava predviđenih za realizaciju ovog programa iskoristit će se za subvencioniranje dijela kamate po programu za 2009. godinu, preduzećima i preduzetnicima koji su ostvarili pravo na subvencije dijela kamate u 2009. godini, ali kojima zbog nedostatka sredstava iz programa za 2009. godinu nisu izvršene uplate za cijelu godinu.

Član 7 (Uslovi koje treba ispuniti korisnik)

Uslovi koje treba ispuniti korisnik subvencije dijela kamata na kredite su:

- a) da je registrovan u Osnovnom sudu Brčko distrikta BiH,
- b) da vrši namjensko ulaganje sredstava na području Brčko distrikta BiH,
- c) da preduzeće ili preduzetnik nije pod stečajem ili likvidacijom, odnosno da nije predmetom postupka za proglašenje stečaja ili likvidacije,
- d) da dostavi dokaze o izmirenju obaveza, sa stanjem ne starijim od 60 dana od dana podnošenja zahtjeva, izdatih od nadležnih institucija koji se odnose na izmirenje obaveza po osnovu poreza i doprinosa.

Član 8 (Postupak odobravanja)

(1) Sredstva predviđena za subvencioniranje dijela kamate u članu 3 Sredstva programa, na osnovu Odluke Vlade Brčko distrikta BiH će biti prebačena na račun Razvojno-garantnog fonda Brčko distrikta BiH.

(2) Razvojno-garantni fond će donijeti pravila i procedure kojima će urediti način i procedure za odobravanje i isplatu subvencioniranog dijela kamate.

(3) Na odobreni kredit od strane banke tražilac kredita podnosi zahtjev za subvencioniranje dijela kamate Razvojno-garantnom fondu Brčko distrikta BiH, za period ne kraći od 3 mjeseca.

Član 9
(Kontrola korištenja i izvještavanje)

Razvojno-garantni fond Brčko distrikta BiH je obavezan mjesečno podnositi izvještaje Odjeljenju za privredni razvoj, sport i kulturu o broju izdatih saglasnosti za subvencioniranje kamata i po tom osnovu isplaćenih sredstava u izvještajnom periodu. Odjeljenje za privredni razvoj, sport i kulturu dužno je najmanje jednom u šest mjeseci dostaviti Vladi Brčko distrikta BiH, odnosno gradonačelniku, informaciju o realizaciji Programa subvencioniranja dijela kamate na kredite za preduzeća / samostalne preduzetnike i podružnice na području Brčko distrikta BiH za 2010. godinu.

Broj: 01-02-212/10-1
Brčko, 14. aprila 2010. godine

PREDSJEDNIK
SKUPŠTINE BRČKO DISTRIKTA BiH

Mirsad Đapo, dipl. pravnik, s.r.